

COMUNI DE SABARUSSA
Províntzia de Aristanis



**STATUTU
COMUNALI**

INDIXI

<u>INDIXI</u>	2
<u>TITULU PRIMU</u>	6
<u>PRINCIPIUS GENERALIS E DE PROGRAMMA</u>	6
<u>Art. unu</u>	6
Definitzioni	6
<u>Art. duus</u>	6
Su logu e sa sedi de sa biddu	6
<u>Art. tres</u>	7
Stemma , stendardu e bullu	7
<u>Art. cuatru</u>	7
Finalidadis	7
<u>Art. cincu</u>	8
Programatzioni e formas de agiudu	8
<u>Art. sesi</u>	9
Agiudus cun is istadus stràngius	9
<u>Art. seti</u>	9
Formas Limbisticas e atus de su Comuni	9
<u>Art. otu</u>	9
Albu Pretoriu	9
<u>Art. noi</u>	10
Diritu a sa Saludi	10
<u>Art. degghi</u>	10
Diritu a su Studiu	10
<u>Art. undighi</u>	11
Amparu de su logu, de sa storia e de dogna arti	11
<u>Art. doighi</u>	11
Promotzioni de is benis culturalis, de su sport e de su tempus liberu	11
<u>Art. treighi</u>	11
Assetiu e impreu de su logu de sa biddu	11
<u>Art. catòdighi</u>	12
Svilupu economicu	12
<u>Art. bindighi</u>	13
Partecipatzioni, decentramentu, agiudu rèciprocu, informatzioni	13
<u>TÌTOLU DUUS</u>	13
<u>IS ORGANUS DE GUVERNU DE SU COMUNI</u>	13
<u>Cabudu primu</u>	13
<u>Ordinamentu</u>	13
<u>Art. seighi</u>	13
Organus	13
<u>Cabudu segundu</u>	14
<u>Su contzillu comunali</u>	14
<u>Art. degaseti</u>	14
Poderis	14
<u>Art. deghiotu</u>	14
Prima adunantzia	14
<u>Art. deganoi</u>	14
Riunionis e tzerriadas	14
<u>Art. binti</u>	15
Su programma de is cosas chi si depint fai	15
<u>Art. bintunu</u>	15
Comissionis	15
<u>Cabudu tertzu</u>	16
<u>Is contzilleris comunali</u>	16
<u>Art. bintiduis</u>	16
Su contzilleri comunali	16
<u>Art. bintitres</u>	16
Doveris	16
<u>Art. binticuatru</u>	17
Poderis	17
<u>Art. binticincu</u>	17

<u>Dimissionis</u>	17
<u>Art.bintises</u>	17
<u>Comenti si podit cambiai o supliri su contzilleri comunali</u>	17
<u>Art.bintiseti</u>	18
<u>Grupus de su contzillu</u>	18
<u>Cabudu quartu</u>	18
<u>Sa Giunta comunali</u>	18
<u>Art.bintotu</u>	18
<u>Sa giunta Comunali</u>	18
<u>Art.bintinoi</u>	19
<u>Comenti est fata sa Giunta Comunali</u>	19
<u>Art.trinta</u>	19
<u>Sa nòmina</u>	19
<u>Art.trintunu</u>	20
<u>Comenti triballat sa Giunta Comunali</u>	20
<u>Art.trintaduus</u>	20
<u>Atributzionis de sa Giunta Comunali</u>	20
<u>Cabudu cuintu</u>	20
<u>Su Sindigu</u>	20
<u>Art.trintatres</u>	20
<u>Nòmina e cumpetenzias</u>	20
<u>Art.trintacuatru</u>	21
<u>Atributzionis de Amministratzioni</u>	21
<u>Art.trintacincu</u>	22
<u>Atribuzioni de vigilàntzia</u>	22
<u>Art.trintases</u>	22
<u>Atribuzioni di organizatzioni</u>	23
<u>Art.trintaseti</u>	23
<u>Vice sindigu</u>	23
<u>Art.trintotu</u>	23
<u>Dimissionis e impedimentu po sempri de su Sindigu</u>	23
<u>Art.trintanoi</u>	24
<u>Motzioni de sfiducia</u>	24
TITOLU TRES	24
PARTECIPATZIONI E DIRITUS DE SA GENTI DE SA BIDDA	24
<u>Cabudu primu</u>	24
<u>Partecipatzioni de sa bidda</u>	24
<u>Art.coranta</u>	24
<u>Principius</u>	24
<u>Art.corantunu</u>	24
<u>Istitutus de partecipatzioni</u>	24
<u>Cabudu segundu</u>	25
<u>Formas de Associatzionis e acàpius cun su Comuni</u>	25
<u>Art.corantaduus</u>	25
<u>Associatzionis e voluntariau</u>	25
<u>Art.corantatres</u>	25
<u>Agiudus a is associatzionis</u>	25
<u>Cabudu tertzu</u>	26
<u>Consultazions e propostas de sa bidda</u>	26
<u>Art.corantacuatru</u>	26
<u>Consultatzionis de sa bidda</u>	26
<u>Art.corantacincu</u>	26
<u>Referendum consultivu</u>	26
<u>Art.corantases</u>	27
<u>Operatividadis de su referendum consultivu</u>	27
<u>Cabudu quartu</u>	27
<u>Diritu de podi castiai e de conosci is documentus</u>	27
<u>Art.corantaseti</u>	27
<u>Diritu de podi castiai is documentus</u>	27
<u>Art.corantotu</u>	28
<u>Diritu de podi oteni informatzionis</u>	28

<u>Art.corantanoi</u>	28
<u>Ufizziu po is diritus de sa bidda de oteni informatzionis</u>	28
<u>Cabudu cuintu</u>	28
<u>Su difendidori Civicu</u>	28
<u>Art.cinquanta</u>	28
<u>Nomina</u>	28
<u>Art.cinquantunu</u>	29
<u>Incompatibilidadi e decadentzia</u>	29
<u>Art.cinquantaduus</u>	30
<u>Stumentus e possibilidadi</u>	30
<u>Art.cinquantatres</u>	31
<u>Acàpius con su Contzillu</u>	31
<u>Art.cinquantacuattu</u>	31
<u>Indennidadi po su triballu</u>	31
<u>Cabudu sestu</u>	31
<u>Partecipazioni a su triballu amministrativu</u>	31
<u>Art.cinquantacincu</u>	31
<u>Partecipazioni a su procedimentu amministrativu</u>	31
<u>Art.cinquantases</u>	32
<u>Interrogazioni</u>	32
<u>Art.cinquantaseti</u>	32
<u>Petizioni</u>	32
<u>Art.cinquantotu</u>	33
<u>Propostas</u>	33
TITULU CUARTU	33
BISONGIUS PUBBLICUS	33
<u>Cabudu primu</u>	33
<u>Agiudu cun is Entis</u>	33
<u>Art.cinquantanoi</u>	33
<u>Principiu de di coperazioni</u>	34
<u>Cabudu segundu</u>	34
<u>Formas de agiudu</u>	34
<u>Art.sessanta</u>	34
<u>Conventzionis</u>	34
<u>Art.sessantunu</u>	34
<u>Consortzius</u>	34
<u>Art.sessantaduus</u>	35
<u>Comunis impari</u>	35
<u>Art.sessantatres</u>	35
<u>Acodrius a suba de is cosas de fai</u>	35
<u>Cabudu tertzu</u>	35
<u>Srebitzius publicus de su logu</u>	35
<u>Art.sessantacuattu</u>	36
<u>Cualificazioni e carateristicas</u>	36
<u>Art.sessantacincu</u>	36
<u>Formas de manigiu</u>	36
<u>Art.sessantases</u>	36
<u>Manigiu in economia</u>	36
<u>Art.sessantaseti</u>	36
<u>Aziendas specialis</u>	37
<u>Art.sessantotu</u>	37
<u>Istituzioni</u>	37
<u>Art.sessantanoi</u>	38
<u>Societadi a prevalentzia de capitali publicu de su logu</u>	38
<u>Art.setanta</u>	38
<u>Societadi po atzionis o a responsabilidadi limitada</u>	38
TITULU CUINTU	38
ORGANIZAZIONI DE SA STRUTURA OPERATIVA	38
<u>Cabudu primu</u>	38
<u>PrincipiUS ed organizazion de is officius e de su personali</u>	38
<u>Art.setantunu</u>	38
<u>Criteria generali</u>	39

Art.setantaduus	39
PrincipiUS strutralis ed organizativus	39
Art.setantatres	40
Ordinamentu de is officius e de is sreibitzius.....	40
Art.setantacuatru	40
Strutura	40
Art.setantacincu	40
Diritus e doveris de is dependentis de su Comuni	40
<i>Cabudu segundu</i>	40
<i>Segretariu comunali</i>	40
Art.setantases	40
Segretariu comunali	40
Art.setantaseti	41
Vicesegretariu Comunali	41
<i>Cabudu tertzu</i>	41
<i>Funzioni gestionali</i>	41
Art.setantototu	41
Indirizo	41
TITULU SESTU.....	42
ORDINAMENTU FINANTZIARIU E CONTABILI.....	42
<i>Cabudu primu</i>	42
<i>Demaniu-Benis</i>	42
Art.setantanoi	42
Demaniu e patrimoniu	42
<i>Cabudu segundu</i>	42
<i>Impiantu contabili</i>	42
Art.otanta	42
Ordinamentu de sa contabilidadi de su Comuni	42
Art.otantunu	43
Rendicontu de sa gesioni	43
Art.otantaduus	43
Revisori de is contus.....	43
Art.otantatres	44
Controllus internus de sa contabilidadi de su Comuni.....	44
<i>Cabudu tertzu</i>	44
<i>Intrada de is fundus</i>	44
Art.otantacuatru	44
Sreibitziu de tesoreria	44
<i>Cabudu quartu</i>	44
<i>Is agentis contabilis</i>	44
Art.otantacincu	45
Contus de is agentis contabilis.....	45
<i>Cabudu cuintu</i>	45
<i>Atividadu contratuiali</i>	45
Art.otantases	45
Autonomia contratuiali	45
TITOLU SETIMU	45
DISPOSITZIONIS FINALIS	45
<i>Cabudu primu</i>	45
<i>Normas transitòrias e finalis</i>	45
Art.otantaseti	45
Statutu	45
Art.otantototu	46
Regolamentus chi funti in vigori	46
Art.otantanoi	46
Intrada in vigori de is regolamentus.....	46
Art.noranta	46
Adeguamentu de is funtis normativas de su comuni a leys bennias a pustis	46
Art.norantunu	46
Intrada in vigori	47

TITULU PRIMU PRINCIPIUS GENERALIS E PROGRAMMA

Art.unu Definitzioni

1. Sa comunidadi de Sabarussa:
 - a) est enti de su logu autònomu chi tenit rapresentàntzia generali segundu is princìpius de sa Costitutzioni, de is leys de sa Republica Italiana e de custu Statutu;
 - b) est un enti democràticu chi creidi in is princìpius de s'Europa, de sa paxi e de s'agiudu in cuncòrdiu;
 - c) cunsiderat sa particulari realidadi de su logu e de sa sociedadi innui s'assetiat, recramat po issa e po tòtus is atrus Comunis un particulari arròlu in sa gestioni de is risorsas de su logu, in s'assetiu de is srebitzius po sa genti; tòtu custu arrispetendi sa sussidiariedadi chi narat ca sa responsabilidadi publica est de s'autoridadi prus acanta a is citadinus;
 - d) avalorat dogna forma de acòdriu cun is atrus entis de su logu;
 - e) fait, cun is poderis e is istitutus de custu Statutu, su manigiu a sou de tòtu sa comunidadi;
 - f) custu Statutu est cunformau a is normas de su T.U.E.L. aprovau cun Decretu Legislativu n^u 267 de su 18 Austu de su 2000 e totu is mudaduras e is integratzionis fatas a pustis.

Art. duus Su logu e sa sedi de sa bidida

1. Su logu de su Comuni de Sabarussa est formau de sa bidida e de su brugu agricolu Pardu Nou, est longu Kmq. 32,60, e lacanat cun is comunis de Baulau, Aristanis-Sibì, Pau, Siiamajori, Simaghisi, Tramatzza e Zrofolliu;
2. Is atòbius de is organus eletivus collegialis si faint in sa domu comunali. De candu in candu, po calincunu abbisongiu, su Contzillu si podit atòbiai in atrus logus, diversus de s'impropriu;
3. Su cambiù de su nomini de su Comuni si podit fai sceti cun domanda de su Contzillu a pustis de ai domandau su pareri de tòtu sa bidida;
4. Aintru de su logu de su Comuni non si podint, po cantu narat su Comuni, fai centralis nuclearis e nemancu fai passai o frimmai ordignus de gherra nuclearis o iscartus radioativus.

Articulu tres Stemma, gonfaloni e bullu.

1. Su Comuni in is atus e in s'imprenta s'arreconnoscit cun su nomini de Comuni de Sabarussa e cun su stemma giâu de su Presidenti de sa Repubblica cun su decretu de su 3 de Mratzu de su 1988 n. 1708;
2. In is cerimonias e in tòtus is arrecurrentzias publicas, acumpangiau de su sindigu e potau de is guardias si podit ammostai su gonfaloni de su comuni, chi est sa pandera cun su stemma giâu arreconnotu de su Presidenti de sa Repubblica cun su decretu de su 3 de mratzu de su 1988 n. 1708;
3. S'impreu e sa riprodutzioni de custus sìmbulus po cosas chi no interessant su Comuni si podit fai sceti comentis disponidi su regolamentu;
4. Su bullu est su timbru cun su stemma de su Comuni, signat is atus e is paperis e ddu su fait legalis.

Articulu cuatru Finalidadis

1. Su Comuni s'ingnat po favoressi su crescimentu civili, sociali, economicu, culturali e storicu de sa bidde tenendi presentis is valoris de sa Costituzione;
2. Su Comuni cricat s'agiudu de tötus, publicus e privaus, e cherit chi tötü sa popolatzioni pighidi parti impari a is forzas socialis, economicas e sindacalis po triballai in paris.

Su comuni triballat s'ghendi custus principius:

- a) po ndi tirai is troturas economicas, socialis, e territorialis chi nci funti siat in su logu impropriu siat in su logu nazionali;
- b) po ndi bogai is impedimentus storicus, economicus, culturalis e socialis po giai is stessas oportunitadis a tötus e comenti est scritu in sa Costituzione po apatai s'omini cun sa femmia;
- c) po favoressi is proostas economicas publicas e privadas, mancai ponendi impari is forzas economicas e de cooperatzioni;
- d) agiudendi a fai un sistema de seguresa po tötus e po sa persona mancai cun su triballu de is organizatzionis de voluntariu;
- e) po s'amparu e su crescimentu de is benis naturalis, storicus e culturalis chi ddui funti in su logu impropriu po favorissi tötü sa comunidadi;

Articulu cincu Programmatzioni e formas de agiudu

1. Su Comuni fait su chi depit pighendi po agiudu tötus is ainas e su mètodu de sa programatzioni;
2. Su Comuni triballat po arribai a is iscopus crefius de su Stadu e de sa Regioni, e si fait agiudai in custu de is forzas socialis, economicas, sindacalis e culturalis chi nci funti in sa bidde;
3. Is acàpius cun is atrus Comunis, cun sa Provintzia e cun sa Regioni, funti sempri in s'arraspetu de is principius de agiudu, paridadi, complementariedadi e sussidiariedadi cun is dissimbillantis autonomias de dognunu;
4. Po otenni su mellus de is sreibitzius su Comuni si relatat cun is atrus Entis Publicus chi ddui funti e triballant in su logu po promovì e agatai formas de associatzionis prus giustas po is atividadis, is sreibitzius e is triballus de fai e a is obietivus chi si oint sodigai;
5. Su Comuni, po is istessas arrexonis, podit incarrigai a is Entis Publicus chi triballant in su logu de sa bidde is funtzionis suas, o puru promovì formas de agiudu cun sugetus privaus po favoressi sa nàscita e su sviluppu de is atividadis chi point essi interessantis po tötus.

Articulu ses Agiudus cun is istadus stràngius

1. Su Comuni de Sabarussa, segundu su chi narat sa Costituzione, podit intratenni cun Comunis de istadus stràngius acàpius, arellatus culturalis e socialis po s'ghì s'agiudu e su sviluppu de sa genti e po is diritus de s'omini;
2. Su triballu de su Comuni est fatu in armonia cun is principius de sa Carta de is Natzionis Unidas e de sa Carta europea de is autonomias de su logu, mancai siat cun s'acodriu de is associatzionis meda importantis fintzas foras de sa natzioni.

Articulu seti
Formas limbisticas e atus de su Comuni

1. Is limbas de su Comuni funti s'italianu e su sardu;
2. In is setzidas de is Organus de su Comuni e de is istituzionis suas sa limba sarda si podit impreai, ma is paperis depint essi scritus in limba italiana. Su chi impreat sa limba sarda depit ammostai su paperi scritu in limba italiana po essi allogau.

Articulu otu
Albu pretóriu

1. Is atividadis de su Comuni funti fatas arrispetendi su principiu de sa publicidadi chi permitit de dda sa connosci a tòtus;
2. In sa Domu Comunali s'est agatau su logu po poni s'«Albu Pretóriu» po sa publicatzioni de is atus, provedimentus e avisus e tòtu su chi depit essi a bideus de tòtus segundu sa ley, su statutu e is regolamentus;
3. Sa publicatzioni depit assegurai chi custus paperis podint essi bius fintzas cun s'impreu de is tennicas noas;
4. Su Segretariu Comunali s'incurat de s'afisciadura comenti narat su primu comma, impreat po custu su missu de su Comuni e, cun su fueddu de custu, ndi certificat s'afisciadura.

Articulu noi
Diritu a sa saludi

1. Su Comuni fait de tòtu po assegurai, po su chi podit fai, su diritu a sa saludi; fait in modu chi ci siant is ainas po deassegurai, tenendi atenzioni po s'amparu de sa saludi e sa seguresa in su logu de triballu, e in is logus innui si bividi aintru de sa bidida;
2. Si giat de fai in manera chi in sa bidida ddui siat un s'rebitziu de assistentzia sociali giendi atenzioni in primu logu a is becius, a is pipius, a sa gioventudi, a is invàlidus, e a chi tenit callincunu handicap.

Articulu degghi
Diritu a su studiu

1. Su Comuni cuncurriddi cun su Stadu e sa Regioni po giai a tòtus su diritu a su studiu;
2. Si giat de ita fai po ndi tirai tòtus is ostaculus socialis e economicus, chi si ponint de travessu po assegurai a sa comunidadi su diritu a su studiu.

Articulu undighi
Amparu de su patrimoniu naturali, stòricu e artisticu

1. Su Comuni fait tòtu su chi podit po amparai e allogai s'ambienti, cun progetus de amparu po sa terra e po su chi c'est asuta de sa terra, boghendinci tòtus is arrexionis de imbrutamentu de s'aria, de su rumori e de is'abbas;
2. Amparat e fait de tòtu po cuntrollai is benis storicus, artisticus e archeologicus, assegurendi su gosu de custas cosas a tòtus;
3. Fait de tòtu po cricai in sa storia sua una dì de festa po amparai s'identidadi de sa bidida.

Articulu doighi

Promotzioni de is benis de sa cultura, de su sport e de su témpus liberu.

1. Su Comuni favoressit sa crescita de sa cultura, fintzas in sa limba, in is usantzas de su logu fendi de tòtu po poni custu patrimoniù a dispositzioni de tòtus e po du fai cresci;
2. Incoragiat e favoressit su sport e su turismu sociali e de sa gioventudi;
3. Po arribai a fai tòtu custas cosas favoressit sa nàscita de is entis, organismus, e associatzionis de cultura, de discanciu e sportivas; fait de tòtu po fabbricai logus po custas atividadis asseguendi s'intrada a is associatzionis de sa bidda;
4. S'impreu de custus fabbricus, de is srebizius e is impiantus, est disciplinau de su regulamentu comunali.

Articulu treighi

Assetiu e impreu de su logu de sa bidda

1. Su Comuni promovidi e assètiat su logu de sa bidda, aintru de un programma de crèscida de is insediamentus, de is infrastruturas e de is impiantus industrialis, artigianalis, turisticus e de cummèrciu;
2. Fait pianus de ammanadura de s'edilizia pùbblica, po assegurai sa domu a tòtus;
3. Aprontat operas de urbanizazioni primaria e segundaria, segundu su chi srebidi e segundu is prioridadi definidadi in is pianus de atuazioni;
4. Assètiat su trafficu e sa circolazioni, segundu su chi srebidi a sa bidda e a chi ddui passat, crichendi de giai atenzioni prus de tòtu a is abbisòngius de su triballu, de s'iscola e de su turismu;
5. Peparat ainas de prontu interventu, de impreai in casu de abbisòngiu candu ddui funti calamidadis;
6. Portat a càstiu sa crescida urbanistica e edilizia e ndi multat is violatzionis cun is ainas chi ddi giai sa ley de su stadu e de sa regioni.

Articulu batoighi

Svilupu economicu

1. Su Comuni cuncertat is atividadis de su cummèrciu e fait de tòtu po assentai tòtu sa distribuzioni po assegurai chi tòtu su triballu funtzionidi beni;
2. Favoressit s'artigianau, prus de tòtu cussu artisticu; fai de tòtu po apretai s'atividadi po ndi favoressi is associatzionis, po giai sa possibilidadi a tòtus de assetiai su chi si fait e po tenni su guadangiu giustu;
3. Acrescidi is atividadis de su turismu, fendi de tòtu po rinnovai e fai cresci is ainas po is srebizius turisticus;
4. Favoressit e amparat tòtu su chi arriguardat sa difesa de sa natura e de is risorsas suas, de su patrimoniù storicu, artisticu, culturali e po sa crèscida de s'agricoltura;
5. Promovidi e s'incurat de sa crèscida de s'economia sempri in s'arrispetu de sa programmatzioni natzionali, regionali, provintziali e comunali, fendi de tòtu po giai atenzioni a su triballu fintzas cun sociedadis deincektivus.

Articulu bindighi

Partecipazioni, decentramentu, agiudu rèciprocu, informatzioni.

1. Su Comuni fait s'autonomia sua asseguendi sa partecipazioni de tòtu sa bidde a s'atividadis politica e amministrativa de s'Enti;
2. Su Comuni riconoscidi comenti fondamentali s'istitutu de s'informatzioni e s'incurat, po custu motivu, de is ainas giustas po difai connosci is programmas, is decisionis e is atus prus importantis de su comuni po gai sa possibilidadi a tòtu sa bidde de nai de ita abbisongiat.

TITULU II IS ÒRGANUS DE GUVERNУ DE SU COMUNI

Cabudu primu *Ordinamentu de su Comuni*

Articulu seighi Òrganus

1. Funtis òrganus de su Comuni su Contzillu comunali, sa Giunta e su Sindigu e is cumpetentzias insoru funti stabilidas de sa ley e de custu statutu;
2. Su Contzillu comunali est cussu chi deciddit is cosas e dda sa controllat politicamenti e amministrativamenti;
3. Su Sindigu est responsabilis de s'amministratzioni e rapresentat po sa ley su Comuni; e in prus tenit is funtzionis de Uffiziali de Governu segundu is leys de su statutu;
4. Sa Giunta triballat impari cun su Sindigu po sa gestioni amministrativa de su Comuni e fait de tòtu po proponni cosas de fai a su Contzillu.

Cabudu segundu *Su Contzillu Comunale*

Articulu degaseti Poderis

1. Su Contzillu comunali podit deciddi po contu suu sempri rapresentendi tòtu sa bidde, deciddit s'incarreramentu politicu e amministrativu e averigat su chi at deciddiu;
2. S'elegidura, su tempu de incarrigu, comenti est fatu e sa sciollidura de su Contzillu comunali funti tòtu cosas regoladas de sa ley.

Articulu deghiotu Prima riunioni

1. Sa prima tzerriada de su Contzillu Comunale, a pustis de is eletzionis po ddu rinnovai, benit fata de su Sindigu aintru de deghi diis de sa proclamatzioni de is eligius e sa riunioni depit essi fata aintru de deghi diis de sa tzerriada;
2. Candu ddu at s'impossibilidadi po sèmpiri, o po decadentzia, o po essi steti bogau o poita est mortu su Sindigu su Contzillu Comunale benit sciòllu; su Contzillu e sa Giunta abarrant in carriga fintzas a sa dì de is eletzionis e su chi depit fai su Sindigu ddu fait su Vice Sindigu;
3. In sa prima riunioni su Contzillu Comunale pentzat a gai sa cunfirma a is contzilleris; su sindigu giat nova de sa nomina de is cumpentis de sa Giunta e de su Vice Sindigu.

Articulu deganoi Sètzidas e tzerriadas

1. Su triballu de su Contzillu comunali benit fatu in riunionis ordinarias e straordinarias urgentis;
2. Su triballu suu est definiu aintru de su regulamentu fatu po su Contzillu Comunali aprovau cun maggiorantzia assoluta de is contzilleris comunali impari cun su Sindigu.

Articulu binti Lineas programmàticas de su mandatu

1. Aintru de trinta diis de candu su Contzillu at pigau s'incarrigu, su Sindigu, intendia sa Giunta, presentat su programma de tòtu su chi si depit fai mentris ddu est su mandatu politicu amministrativu;
2. Dogna Contzilleri comunali tenit su diritu de interverni po dicidi su chi si depit fai, giaidi atras ideas o comentis si podint càmbiai, tòtu custu grazias a emendamentus chi presentat sighendi su regulamentu de su Contzillu Comunali;
3. Assumancu dogna annu su Contzillu controllat po biri chi custu programma benit fatu de su Sindigu e de tòtu is assessoris candu ddu est sa verifica de su bilanci. Su contzillu podit aciungi o cambiai in su mentris chi est in carriga, su programma segundu su chi s'rebit a sa bidida.

Articulu bintunu Comissionis

1. Su Contzillu Comunali podit fai, deliberendi, Commissionis chi durant sempiri, unu certu tempus o specialis, po cuntrollai, po connosci e po studia. Custas Commissionis funti fatas sceti de Contzilleris comunali segundu is votus pigaus. Po is commissionis chi depint cuntrollai e garantii, sa Presidentzia est sceberada de sa minorantzia;
2. Po sciri comentis depint triballai, comentis funti fatas, su chi point fai, cantu depint durai, tocat cuntrollai su regulamentu de su Contzillu Comunali.

Cabudu tertzu *Is contzilleris comunali*

Articulu bintiduu Su contzilleri comunali

1. Sa positzioni giuridica e su status de is contzilleris funt regulaus de sa ley; issus esercitant sa funtzioni insoru chentza de vinculu de mandatu, rapresentant su territòriu intreu e sa comunitadi chi ddui bivit e a issa depint arrespondi s'empiri;
2. Is Contzilleris comunali inrant in carriga candu funti aclamaus, invecis candu unu depit intrai a su postu de unu atru, intrat a pustis chi ddu decidit su Contzillu;
3. Su Contzilleri antzianu est cussu chi at pigau prus votus po issu chentza de contai is votus de sa lista. A paridadi de votus si contada s'edadi. Candu ci funti is riunionis e mancat fintzasa su Vice Sindigu, presiedinti is atrus assessoris segundu s'edadi. Candu is assessoris funti esternus presiedidi su Contzilleri antzianu;

4. Dogna contzilleri depit sceberai innui bivi in su logu de su Comuni po ddi mandai is tzerriadas de su Contzillu e dogna atra comunicatzioni uficiali.

Articulu bintitres Doveris

1. Is contzilleris comunalis tenint su doveri de andai a is riunionis de su Contzillu comunali e de triballai cun is Comissionis insoru;
2. Is Contzilleris Comunali chi chentza de arragioni giusta panua, no andant a duas riunionis ordinarias e a is riunionis straordinarias de mesu, benint bogaus de Contzilleris cun delibera de su Contzillu Comunali. Su Sindigu, a pustis de ai acrarau ca su Contzilleri est mancau de is riunionis provididi cun paperi scritu a si ddu fai sciri. Su Contzilleri podit giai a su Sindigu tòtus is paperis chi ddu giustificant, aintru de sa dì previdia de s'avisu, chi non podit essi prus pagu de binti diis de sa dì chi su paperi est steti arriciu. Scadida custa data, su Contzillu controllat e a sa fini deliberat, tenendi presenti is giustificatzionis giadas de su Contzilleri e totu.

Articulu binticuatu Poderis

1. Su contzilleri tenit e impreat su diritu de deliberai de bidea sua po tòtus is atus de cumpetentzia de su Contzillu Comunali e podit fai interrogatzionis, interpellantzas, motzionis e istantzas de sindacau ispetivu;
2. Tenit diritu de otenni de is uficius de su Comuni e de is aziendas, istituzionis o entis dipendentis, tòtus is noas e is informatzionis chi ddi srebint po triballai;
3. Comenti impreai su diritu de triballai segundu sa bidea insoru e po cuntrollai de is Contzilleris comunalis si podit ligi in su regolamentu de su Contzillu comunali;
4. Depit mantenni su segretu de oficiu, in tòtus is casus chi narat sa ley.

Articulu binticincu Dimissionis

1. Is dimissionis de s'incarrigu de contzilleri depint essi mandadas a su Contzillu comunali e in su momentu benint scritas in sa prisia de su Comuni sighendi sa dì chi funtis stetias giadas. Non si podit prus torrai acoa, non srebit atra cosa e funti eficacis luegu e totu. Su Contzillu in degghi diis e non de prus, depit cambiai is contzilleris chi si nchi funti andaus.

Articulu bintises Comenti si podit cambiai o supliri su contzilleri comunali

1. Chi su postu de contzilleri comunali abarrat buidu po calisiat motivu, mancai siat cosa bennia acoa, custu benit giau a su candidau de sa stessa lista chi beniat acoa de s'urtimu eligiù;
2. Chi su Contzilleri benit suspendiu, in sa prima riunioni afatanti a sa notifica si giat s'incarrigu in su mentris a su primu de is no eligius de sa stessa lista. S'incarrigu finit candu est finia sa suspensioni e candu invècias arribat sa fini de s'incarrigu si fait sa surrogatzioni, comenti narat su 1° comma.

Articulu bintiseti Grupus de su contzillu

1. Is Contzilleris si ponint in paris segundu su chi narat su Regolamentu de su Contzillu Comunali;
2. Custus grupus funtis sceberaus in is listas chi funtis stetias presentadas a is eletzionis e is capu grupus in mesu de is Contzilleris chi non funti in sa Giunta e chi siant stetius is prus votaus;
3. A is capu grupus de su Contzillu si depint giai tòtus is documentus e is informatzionis chi cherint chentza de pagai nudda, po podit triballai.

Cabudu quartu
Sa Giunta Comunali

Articulu bintotu
Sa Giunta Comunali

1. Sa Giunta est un organu chi proponit e triballat aintru de su trastigiu amministrativu, impari cun su Sindigu a su governu de su Comuni e fait tòtu cun trasparentzia e beni;
2. Sa Giunta fait de tòtu po arribai a is obietivus e finalidadis de s'enti aintru de is cosas decidias de su Contzillu comunali. Massimamenti, sa Giunta Esercitat is funtzionis de inditu politicu-amministrativu, aprontendi is obietivus e is programmas de fai e addotendi is atrus atus chi rientrant in sa faina de cussas funtzionis, e aberigat sa corrispondentzia de is resultaas de sa faina amministrativa e de sa gestioni a is inditus chi funt istaus assinniaus.

Articulu bintinoi
Comenti est fata sa Giunta Comunali

1. Sa Giunta est fata de su Sindigu, chi est su Presidenti e de un numeru de Assessoris chi non depit essi prus pagu de duus e prus de cuatru de custus unu est su vice sindigu. Su Sindigu decididit su numeru de is assessoris chi faint parti de sa Giunta po arrexionis politicas-amministrativas;
2. Podint essi tzerrius a fai is assessoris fintzas citadinus chi non funti Contzilleris, su massimu unu, bastat chi tengiat tòtus is titulus chi srebint po fai su Contzillu comunali. S'assessori esternu intrat a fai parti de is riunionis de su Contzillu comunali chentza diritu de votu sceti po chistionai de is cosas chi interessant sa delega sua;
3. Su Sindigu candu nomìnada is assessoris cicat, candu fait, segundu sa disponibilitadi e sa professionalidadi chi ddu at, de nomìnai aintru de sa Giunta ominis e femmias.

Articulu trinta
Sa nòmina

1. Su vice Sindigu e tòtus is atrus chi faint parti de sa Giunta funti nomìnauas de su Sindigu e depint essi presentaas a su Contzillu Comunali in sa prima riunioni a pustis de is eletzionis;
2. Su Sindigu podit cambiai unu o prus assessoris cun decisioni motivada e ddu depit nai a su Contzillu e aintru de 15 dis giai su nomini de is atrus;
3. S'incompatibilitadi, sa posizioni e su stadu giuridicu de is assessoris fintzas is istitutus de su decaimentu e po ndi pigai s'incarrigu funti disciplinaus de sa ley;
4. Non point fai parti de sa Giunta Comunali, in prusu de tòtus is casus previdius de sa ley, s'arentzia de su Sindigu fintzas a su tertzu gradu de parentela;
5. Francu is casus innui su Sindigu ndi pigat s'incarrigu, sa Giunta abarrat in carriga fintzas a sa di

de is eletzionis candu si torrat a fai su Contzillu Comunali.

Articulu trintunu Comenti triballat sa Giunta

1. Sa Giunta est tzerriada e ddi fait de Presidenti su Sindigu, chi cuncertat e portat a càstiu su chi faint is assessoris e stabiliscidi su chi si depit decidi in is riunionis, chentza de perdi tempus in formalidadis ma tenendi presenti is cosas chi funti stetias propostas;
2. Comenti tzerriai e fai funtzionai sa Giunta est decidiu de issa e tòtu chentza de perdi tempu in formalidadis;
3. Po chi is riunionis siant bàlidas bisongiat chi ddui siat assumancu sa metadi de is assessoris e is deliberatzionis siant decidias de sa prus parti de is presentis;
4. I verbalis de is riunionis funti frimmaus de su Sindigu e de su Segretariu Comunali.

Articulu trintaduus Atributzionis de sa Giunta

1. Sa Giunta triballat impari cun su Sindigu po governai su Comuni cun decisionis pigadas tòtus imparis;
2. Sa Giunta triballat po fai su chi at proponniu su Contzillu e cricat de ddu spricuai po triballai mellus;
3. Sa Giunta fait tòtus is atus chi depit fai chi governat ea parti su chi depit fai su Contzillu e su chi depit fai sceti su Sindigu e tòtus is atrus officius burocraticus.

Articulu trintatres Nòmina e cumpetènzias

1. Su Sindigu est eligiu de sa popolatzioni de tòtu sa bidda comenti narat sa ley chi deciddit in prusu tòtus is casus chi non podit essi eligiu, de incompatibilidai, e su stadu giuridicu e is arrexonis chi faint acabbai s'incarrigu;
2. Su Sindigu est su responsabili de su governu de su Comuni e ndi tenit sa rapresentantza, est su presidenti, sovrintendenti e amministradori;
3. Tenit cumpetènzia e poderis po indirizai, cuntrollai su triballu de is assessoris e de tòtus is officius;
4. Su sindigu fait totu is funtzionis de su Stadu e de sa Regioni chi est obligau o legitimau a fai. Issu fait fintzas totu is cosas chi sa ley ddi giat de fait, poita est su chi cumandat su governu de sa bidda;
5. A su Sindigu, in prus de su chi narat sa ley, custu Statutu e is regolamentus ddi giat doveris comenti organu de aministratzioni, cuntrollu e poderis de triballai po contu suu in totu su chi cumpetit su triballu de s'oficiu;
6. Su Sindigu fait su chi depit e decretus e ordinanzas.

Atributzionis de amministratzioni Articulu trintacuattru

1. Su Sindigu

- a) tenit sa rapresentntzia de s'Enti e cun su permissu de sa Giunta podit fai causas innanti de sa giustitzia;
- b) podit fai delega a is assessoris;
- c) issu tenit e dirigidi totu s'atividadi politica e amministrativa de su comuni fintzas su triballu de sa Giunta e de dogna assessori;
- d) pigat e fait propositas po fai acodrius de programma cun is sogetus publicus prevedius de sa Ley;
- e) cunvocat is comitzius po is Referendum consultivus;
- f) gaiat s'incarrigu a su Segretariu Comunali sceberendeddu me in s'elencu fatu a posta;
- g) gaiat e ndi tirat s'incarrigu a su Segretariu Comunali de Diretori Generali candu non ddu est conventzioni cun atrus comunis;
- h) nominat is responsabilis de is officius e de is sreibitzius, gaiat is incarrigus de collaborazioni candu custus srebint;
- i) fait ordinanzas precisas e urgentis po sa sanidadi e s'igieni, ediltzia, sa politzia de su logu, e totu custu po fai in modu chi sa genti de sa biddasiat tranquilla e segura;
- j) sighendi su chi est steti decidiu de su contzillu, giat s'incarrigu o sa revoca a is chi depit rapresentai su comuni ananti de is entis, aziendas e istituzionis;
- k) comentis narant is dispositzionis giadas de su Cintzillu comunali e si ddui funti cussas de sa Regioni e a pustis de ai ascutau is categorias interessadas podit ponit de acodriu is orarius de is butegas e de tötus is atrus negotzius e de is sreibitzius publicus, cun s'acodriu de is responsabilis cumpetentis po su logu de s'aministratzioni interessada, is orarius de aberri a sa genti is Officius publicus chi ddui funti in sa bidda, fendi in modu de acumentai a tötus.

Articulu trintacincu Atribuzionis de vigilàntzia

- 1. Su Sindigu tenit custas funtzionis de vigilàntzia:
 - a) pigat informatzionis e cuntrollat atus, mancai siant riservaus, me in Officius comunalis;
 - b) fait issu e totu o impari cun su Segretariu Comunali o su Diretori Generali, cuntrollus a sus de su triballu de su Comuni;
 - c) fait atus po mantenni is diritus de su Comuni;
 - d) stabilit is cosas chi assegurant chi is officius e is sreibitzius triballint beni segundu is diretivas de su Contzillu e sa Giunta.

Articulu trintases Atribuzionis de organizatzioni

- 1. Su Sindigu tenit, in particolari, custas funtzionis :
 - a) stabilit is cosas de discuti me in is riunionis de su Contzillu, decidit candu ddu tzerriai e ddi fait de presidenti;
 - b) tenit poderis de politzia in is riunionis de su Contzillu e in tötus is riunionis de partecipazioni popolari innui issu est presidenti, aintru de su chi narat sa ley;
 - c) proponit is cosas de discuti e decidit in manera informali is riunionis de sa Giunta est issu su Presidenti de custa.

Articulu trintaseti Vice sindigu

1. Candu su Sindigu non ddui est o no podit benni po un certu tempus, o candu po sa ley non ddu po fai prus, sa parti sua benit fata de su Vice sindigu. Candu su Vicesindigu non ddui est pigat sa parti sua s'Assessori prus antzianu;
2. Chi ddui funti delegas giadas a su Vicesindigu e a is assessoris depit essi giat comunicatzioni a su Contzillu e a tòtus is organus chi sa ley prevedidi.

Articulu trintotu
Dimissionis e impedimentu po sempri de su Sindigu

1. Candu su Sindigu non podit prusu fait su triballu suu, o decadidit o morridi sa Giunta decadidit e benit sciollu fintzas su Contzillu;
2. Is dimissionis chi giat su Sindigu a su Contzillu non si point prusu arretirai candu funti passadas binti diis. Passadas chi siant binti diis si sciollidi su Contzillu e in su stessu tempus si nominada un commissariu.

Articulu trintanoi
Motzioni de sfiducia

1. Su votu contrariu de su Contzillu a una proposta de su Sindigu non di cumportat is dimissionis;
2. Su Sindigu e sa Giunta finint s'incarrigu candu benit aprovada una motzioni de sfiducia votada tzerriendi dognunu;
3. Sa proposta de sfiducia su Sindigu depit tenni una arrexoni e depit essi frimmada assumancu de 2/5 de is contzilleris chentza contai su sindigu, e benit discùtia non prima de dexi diis e non prusu de trinta de sa di chi est stetia presentada. Chi custa proposta benit aprovada si procedidit a sciolli su Contzillu.

TITULU TRES
PARTECIPATZIONI E DIRITUS DE SA GENTI DE SA BIDDA

Cabudu primu
Partecipatzioni de sa bidda

Articulu coranta
Principius

1. Su Comuni fait in manera de promovì e tutelai sa partecipatzioni de totu sa bidda a s'amministratzioni de s'enti po ndi assecurai su bonu andamentu, s'impartzialidadi e sa trasparèntzia;
2. Su Comuni fait in manera chi pighint parti a sa vida publica de su logu fintzas i citadinus de s'Unione Europea e is istrangius chi funti regularis;
3. Po sciri comentis fai po fai balli is diritus e is possibilidadi de is citadinus tocat ligi is regolamentus.

Articulu corantunu
Istitutus de partecipatzioni

1. Funtis istitutus:
 - a) s'associatzionismu
 - b) is consultazionis popularis
 - c) diritus de biri e connosci;
 - d) difenditori civicu;
 - e) partecipazioni a su procedimentu amministrativu.

Cabudu segundu
Formas de associatzionis e acapius cun su Comuni

Articulu corantaduus
Associatzionis e voluntariu

1. Su Comuni arreconoscidi e favoressit is associatzionis chi ddui funti in su logu suu;
2. Non si point arreconosci associatzionis segretas o chi non funti cumpatibilis cun sa Costituzioni, de sa ley o de custu Statutu;
3. Su Comuni fait in manera chi su triballu de is associatzionis siat voluntariu chentza de pagamenti po su beni de sa bidde, e chi tengiant tötus is ainas chi srebint po triballai beni e chi tengiant tötus is amparus po no incurri in is incidentis;
4. Is acàpius de is associatzionis cun su Comuni funti disciplinaus de su regolamentu po sa partecipazioni de is associatzionis.

Articulu corantatres
Agiudus a is associatzionis

1. Su Comuni podit giai agiudus in dinai a is associatzionis, boghendindi is partidus politicus e is sindacaus, po favoressi s'atividadi;
2. Su Comuni podit assegurai a custas associatzionis, giai nomìnadas in su comma precedenti, fintzas in comodau, ainas e srebitzius;
3. Sa manera po giai agiudus o po tenni in comodau ainas o srebitzius de su Comuni est stabiliu ini is regolamentus.

Cabudu tertzu
Consultatzionis e propositas de sa bidde

Articulu corantacuattu
Consultatzionis de sa bidde

1. Su Comuni podit fai consultatzionis de sa bidde po ndi connosci is abisingius o su chi pentzat asuba de su triballu de s'amministratzioni;
2. Su regolamentu po sa consultazione de sa bidde e is referendum disciplinat candu e comentis dda fai.

Articulu corantacincu

Referendum consultivu

1. Su Referendum benit fatu po connosci su chi pentzat sa bidde asuba de chistionis de sa colletividades, cosas chi funti meda importantes;
2. Non si podint fai referendum asuba de pagamentas po su Comuni, de su triballu de s'amministratzioni chie st acapiatu a is leys de su Stadu o de sa Regioni e po totu is cosas chi funti giai stetas fatas in atrus referendum cinc'annus prima;
3. In prusu, non si podit fai su referendum asuba de custas cosas:
 - a. asuba de is normas de su statutu
 - b. asuba de su chi at decidiu su contzillu in is mesis prima de sa consultatzioni;
 - c. asuba de sa genti chi triballat in comuni, de is istituzionis e de is aziendas de su comuni;
4. Su referendum est stabiliu de su Sindigu, a pustis chi su Contzillu ddu decidit fintzas candu est domandau de assumancu duxentus eletoris chi bivint in sa bidde e chi funti iscritus me in is listas eletoralis de su Comuni;
5. Su referendum ballit chi ndi pigant parti assumancu sa metadi prus unu de is eletoris de su Contzillu Comunali;
6. Si su Referendum si podit fai, is tempus chi srebint, de comentis depit essi fatu est stabiliu totu in su regulamentu comunali asuba de sa consultatzioni de sa bidde e de su referendum.

Articulu corantases Operatividades de su referendum consultivu

1. Aintru de trinta diis chi si funti scipius is resulta, su Sindigu depit proponi a su Contzillu Comunali o a sa Giunta, a segunda de is competenzias, sa chistioni chi est steta posta de su Referendum;
2. Si su risultau est stetu favorevoli, su chi decidint is organus de governu de sa bidde non podit essi meda diversu de su chi at decidiu sa bidde;
3. Me in su propriu tempus, si su Referendum no est arrenesciu, si depint pigai e totu provedimentus asuba de sa chistioni posta a referendum pighendi in consideratzioni fintzas se numuru de is participantis a sa consultatzioni e de cantu est stetu su scartu de is votus.

Cabudu quartu *Diritu de podi castiai e de connosci is documentus*

Articulu corantaseti Diritu de podi castiai is documentus

1. Dogna citadinu tenit su diritu de podi castiai is atus de s'amministratzioni comunali e de chi manigiada is srebizius publicus, mancai siant privaus;
2. Non point essi castiaus sceti is atus chi sa ley narat chi funti riservaus o tenint limitis po essi castiaus;
3. Su modu e is tempus po esercitai custu diritu funti stabilius in su regulamentu comunali de is diritus de podi castiai is atus e is papperis de s'amministratzioni de parti de sa popolatzioni.

Articulu corantotu
Diritu de podi oteni informatzionis

1. Is atus de s'aministratzioni, lassendi a parti cussus riservaus segundu sa ley, funti publicus e depint essi fatus connosci a tòtus.

Articulu corantanoi
Oficiu po is diritus de sa bidde de oteni informatzionis

Po giai sa possibilidadi a tòtus i citadinus de podi castiai is atus, e po assegurai imparzialidadi e trasparentzia su Comuni podit fait un oficiu po s'Informatzioni e is relatzionis cun su Publicu, po:

- a) giai noas asuba de is sreibitzius, atus, e stadu de is procedimentus;
- b) fai de tòtu po poni in comunicatzioni su citadinu chi tenit diritu de castiai is atus e su titolari de s'oficiu responsabili de su procedimentu;
- c) giai a s'amministratzionis propositas po tratai cun sa genti de sa bidde.

Cabudu cuintu
Difenditori civicu

Articulu cincuenta
Nomina

1. Su Difenditori Civicu est nominau de su Contzillu Comunali, a pati is bosrtas chi est sceberau in conventzioni cun atrus comunis o cun sa Provintzia, cun votu segretu e a cun i votus de duus tertzus de is Contzilleris, o chi su primu scrutiniu no est srebiu cun sa maggiorantzia de su votu de is Contzilleris;
2. Dogna citadinu chi tengiat is titulus podit presentai sa propria candidatura a s'amministratzioni de su Comuni chi fait una lista a pustis de ai controllau tòtus is titulus;
3. S'incarrigu de su Difenditori Civicu depit essi giai sceberendi in mesu a sa genti chi po connoscentzia e esperientzia gieant sa massima garantzia de indipendentzia, onestadi e competenzia me in is Leys e s'amministratzioni e chi tengiant sa laurea in giurisprudenzia in is scientias politicas o chi atra laurea de paris valori;
4. Abarrat in carriga su matessi tempus chi abarrat in carriga su Contzillu chi ddu at eligiu, fendi su chi depit fai fintzas a candu no est nominau s'atru Difenditori Civicu;
5. Su Difenditori, prima de s'incarrigu, giurat in is manus de su Sindigu nendi “ giuru de sighi cun onestadi is Leys de su Stadu e de fai su chi depu sceti po su beni de tòtus”;
6. Su Difenditori podit essi nominau sceti chi is possibilidadis de su Comuni ddu permitint.

Articulu cincuantunu
Incompatibilidadi e decadentzia

1. Non podit essi nominau Difenditori Civicu:
 - a) chi non podit essi nominau Contzilleri Comunali;
 - b) is parlamentar, is contzilleris regionalis, provincialis e comunalis, chi fait parti de is comunidadi montanas e de is unidadi sanitarias de su logu;

- c) i mistrus de cultu;
 - d) is amministratoris e chi triballat po entis, istituzionis e aziendas publicas o innui ddui est parti publica, e fintzas chi triballat in entis o impresas chi tenint contratus cun s'amministratzioni comunali o in dogna casu chi tenint cun issa, a calisiat titulu, agiudus in dinai;
 - e) chi triballat in calisiat manera, triballu po contu suuo subordinau, atividadi professionali o de cummerciu, chi tengiat acapius cun s'amministratzioni comunali;
 - f) chi tenit arentzia fintzas a sa quarta generatzioni, chi siant amministratoris, segetarius o chi triballint in su Comuni;
2. S'incarrigu de Difenditori Civicu finit po is istessas arrexionis chi si pedrint is titulus po fai su Contzilleri o po atras arrexioni chi funti giai stetias elencadas. Benit aboliu cun deliberatzioni de su Contzillu asuba de una proposta de assumancu unu de is contzilleris. podit essi aboliu cun deliberatzioni motivada de su Contzillu po motivus meda gravis suntzedius fendi su triballu suu.

Articulu cincuantadus Stumentus e possibilitadis

1. S'oficiu de su Difenditori Civicu est postu aintru de aposentus postus a dispositzioni de s'amministratzioni comunali, cun tötus is ainas chi srebint po ddu fai triballai beni;
2. Su Difenditori Civicu podit interverni, candu ddu domandada un citadinu sceti o de prusu, o fintzas de bidea sua, in s'amministratzioni comunali, is aziendas specialis, is istituzionis, chi tenit incarrigu de srebitzius, in is sociedades chi manigiant is srebitzius publicus aintru de su logu comunali, po cuntrollai chi su procedimentu amministrativu siat regolari e chi is atus siant fatus giustus e in is tempus;
3. Po custu podit tzerriai su responsabli de su srebitziu interessau e domandai paperis, noas, e acaramentus, po issu non ddu est segretu deoficiu;
4. Podit, fintzas, domandai de esaminai sa pratica impari aintru de sa data decidia;
5. Candu scidi tötus is cosas chi ddi srebint, giat su parei suu a fueddus o scritu, a su citadinu chi at domandau s'agiudu; chi ddu est ritardu, intimat a is organus interessaus a providid aintru de is tempus definius; depit, in prus segnalai is cosas chi non funtzionant, is abusos e is mancantzas chi at potziu biri;
6. S'amministratzioni depit motivai, candu su chi at segnalau su Difenditori non benit ascutau, e custu podit domandai chi sa chistioni bengiat riesaminada candu at biu irregularidadis o sbaglius in sa procedura;
7. Su sindigu depit in dogna casu poi sa chistioni aintru de is cosas de discuti in sa prima riunioni de s'organu competenti;
8. Tötus is responsablis de srebitziu tenint s'obligu de giai tötü s'agiudu chi podint a su Difenditori Civicu.

Articulu cincuantatres Acàpius con su Contzillu

1. Su Difenditori Civicu presentat, aintru de su mesi de mratzu, una relata asuba de su triballu fatu in s'annu passau, nendi de tötü is cosas malli fatas chi at potziu biri, gendi bideas po assentai is cosas trotas, po dda sa fai andai mellus e po s'impartzialidadi de su triballu amministrativu;
2. Su Difenditori civicu in sa relata giai nomìnada in su primu comma podit giai ideas po mellorai s' atividadi amministrativa e s'eficientzia de is srebitzius publicus, e assegurai s'impartzialidadi de is decisionis;
3. Sa relata depit essi afisciada a s'albu pretoriu, trasmessa a tötus is contzilleris comunalis e discutia aintru de trinta dis in su Contzillu Comunali;
4. Tötus is bortas chi est su casu, su difenditori civicu podit segnalai chistionis a su sindigu;

5. In casus de particulari importantzia o in dogna casu chi depit essi signalau cun apretu, su difenditori, in dogna momentu, podit fai una relata a su contzillu.

Articulu cincuantacuatru Indennidadi po su triballu

1. A su Difenditori Civicu si giat una paga paris a sa metadi de sa paga de su Sindigu.

Cabudu sestu *Partecipazioni a su triballu amministrativu*

Articulu cincuantacincu Partecipazioni a su procedimentu amministrativu

1. In is procedimentus innui benint impreaus atus chi andant a tocai sitiatzionis giuridicas sogetivas est assegurada comenti narat sa ley, sa partecipazioni de is interessaus;
2. Candu s'incumentzat un procedimentu amministrativu si fait sciri a su destinatariu e atòtus is atrus chi narat sa ley;
3. Tòtus is interessaus tenint sa possibilitadi de biri is atus de su procedimentu, a parti su chi sa ley non permitidi de essi biu, e point fintzas presentai paperis scritus chi s'amministratzioni depit stimai. Su chi arresulatada de custa stima depit essi comunicau a is interessaus;
4. Candu ddu est meda pressu o candu is interessaus funti meda o non point essi stabilius beni, insarasa est permitiu de non ddu fai sciri diretamenti ais interessaus ma de ddu publicai in s'albu pretoriu o cun atras ainas, cichendi de assegurai s'informatzioni;
5. Is tempus e is modus funti stabilius in su regolamentu comunali po is procedimentus amministrativus.

Articulu cincuantasesi Interrogatzionis

1. Chinisiat, unu o medas impari, podit pregontai a su sindigu noas de s'atividadi amministrativa.
2. Sa risposta a custas preguntasdepit essi motivada e depit essi giada aintru de trinta dis.

Articulu cincuantaseti Petizzionis

1. Chinisiat podit , impari a is atrus, apretai su triballu de s'amministratzioni asuba de cosas chi interessant a tòtus o po chistionai de is cosas chi srebint a sa bidida;
2. Sa regorta de is frimmas podit essi fata chentza de nisciuna formalidadi asuta de su paperi scritu cun is preguntas de fai a s'amministratzioni;
3. Sa petizzioni benit giada a su sindigu chi, aintru de deghe diis, da giat po essi esaminada a s'organu chi est competentu e una copia da giat a is grupus chi ddu funti in su Contzillu Comunali;
4. Chi sa petizzioni est steta frimmada de assumancu 50 personas s'organu competentu depit nai sa sua aintru de trinta diis partendi de sa dì chi d'at aricia;
5. Su chi at decidiu s'organu competentu, impari cun su paperi de sa petizzioni, depit essi postu a bideus de tòtus in is logus apositus de su Comuni in manera chi tòtus cussus chi ant frimmau ddu point ligi;

6. Chi sa petizioni est stetia frimmada de assumancu 200 personas dogna contzilleri podit domandai chi sa chistioni posta de sa petizioni e totu bengiat discutia in sa riunioni in fatu de su Contzillu Comunali.

Articulu cincuantotu Propostas

1. Chi un numuru de is eletoris de su Comuni, chi non siat prus pagu de 50 faint a su sindigu propostas po atus amministrativus de competenzaia de s'Enti e custas propostas funti fatas a minudu in manera chi s'atu si cumprendada beni, su Sindigu, candu scidi su chi ndi pentzant is responsabilis de su sreibitziu interessau e su segretariu comunali, trasmitidi sa proposta impari a is pareris, a s'organu competenti e ai grupus chi ddui funti in su contzillu comunali aintru de degghi diis chi d'at arriciu;
2. S'organu competenti podit intendi chi at fatu sa proposta e depit fai su chi s'est decidiu aintru de trinta diis de candu at arriciu sa proposta;
3. Custas determinatzionis funti publicadas in is logus apositus e funti comunicadas a is primus tres chi ant frimmau sa proposta.

TITULU CUARTU BISONGIUS PUBLICUS

Cabudu primu Formas de agiudu

Articulu cincuantanoi Principiu de coperatzioni

1. Su Comuni fait de tòtu po collaborai impari a is comunis de acanta, cun sa provintzia, po fait in sa manera prus efficienti totu cussas cosas chi si prestant a essi fatas impari cun atrus entis po is carateristicas socialis e economicas insoru, totu custu po assegurai sreibitzius prus eficacis a sa bidida.

Cabudu segundu Formas de agiudu

Articulu sessanta Cunventzionis

1. Su Contzillu Comunali, asuba de una domanda de sa Giunta, deliberat conventzionis cun amministratzionis de su Stadu, atrus entis publicus o cun privaus po giai sreibitzius publicus prus coordinaus;
2. Is acordius depint stabiliri: is motivus, sa durada, is modus de tratai cun is Entis chi si ponint in paris, is raportus finantziarius e is obligus e is garantzias de dognunu.

Articulu sessantunu Cunsòrtzius

1. Su comuni podit partecipai a fai consortzius cun atrus comunis po fai funtzionai in paris unu o prus servitzius segundu is arregulas chi balint po is aziendas specialis si si point aplicai;
2. Po custu motivu su Contzillu Comunali aprovat, cun sa maggiorantzia assoluta de is contzilleris, unu acordiu a suba de su chi narat s'articulu de prima, in paris cun su statutu de su Cunsortziu;
3. In s'acordiu depit essi craru comentu si depint trasmiti is atus e su chi si decididit po su Consortziu e is entis chi ndi faint parti;
4. Su Sindigu o unu Contzilleri nominau de issu, fait parti de totu cussus chi funtis in su Consortziu e tenit responsabilitadi paris a sa parti chi ddi spetat fissada cun s'acordiu e de su Statutu de su Cunsortziu.

Articulu sessantaduus Unioni de comunis

1. Su Comuni, candu fait, sighendi su chi narat sa ley, ponit is comunis impari cichendi de cun s'obietivus de portai in mellus is struturas pùbblicas e giai sreibitzius prus funtzionantis a sa comunidadi.

Articulu sessantatres Acodrius asuba de is cosas de fai

1. Su Comuni fendu triballus, interventus o programmas previdius de leys specialis o de setoris chi tenint necessidadi de fai un procedimentu dificili po su cordinamentu e s'integratzioni de s'atividadi de prusu sogetus interessaus, promovit e portat a cumprimentu acodrius asuba de is cosas de fai;
2. S'acodriu, in prus de is finalidadi chi sighint, depit prevedi is formas po s'ativatzioni de un arbitrau possibili e de is interventus chi ddi assimbillant e, po su specificu:
 - a) fissai is tempus e is maneras de is atividadi ordinadas prima e necessarias po fai s'acòdriu;
 - b) individuai cun is ainas giustas, comentu su pianu finanziariu, is custos, is logus de is finanziamentus e is regolatzioni chi cumpetint is acàpius intra de is entis interessaus;
 - c) assigurai su coordinamentu de dògna atru acumprimentu chi andat impari.
3. Su Sindigu definidi e fait s'acodriu, fata chi siat sa deliberatzioni de intentus de su Contzillu Comunali, cun s'osservantzia de is atras formalidadi previdias de sa ley e in s'arrespetu de is funtzionis giadas cun su Statutu.

Cabudu tertzu Sreibitzius publicus de su logu

Articulu sessantacuattru Cualificatzioni e carateristicas

1. Su Comuni podit fai e tenit su manigiu de sreibitzius publicus chi tenint po scopu sa produzioni de benis e sreibitzius o fai atividadi cun scopus socialis e po sa promotzioni de su sviluppu econòmicu e civili de sa comunidadi de su logu;
2. I sreibitzius de manigiai cun diritu de esculsividadi funti stabilius de sa ley.

Articulu sessantacincu Formas de manigiu

1. Sa scebera de sa forma de manigiu po dogna sreibitziu depit essi fata a pustis de una valutazzioni chi cunfrontat is formas diferentis de manigiu previdias de sa ley e de custu Statutu;
2. Po is sreibitzius de manigiu in forma imprenditoriale sa cumparazzioni si depit fai intras de s'afidamentu in cuncessioni, formatzioni de Aziendas, de cunsortzius o de sociedadis chi cuntinent in su prus capitali publicu de su logu o sociedadis de atzionis chentza de acapius de sa proprietadi publica de su logu;
3. Po is atrus sreibitzius sa cumparazzioni at essi fata intras de sa gestioni in economia, sa formatzioni de istituzzioni, s'afidamentu in apaltu o in cuncessioni, e fintzas intras de sa forma a sola o cussa in associazzioni cun cunventzioni, unioni de comunis o cunsòrtziu;
4. In s'organizazzioni de is servitzius depint essi, in dònna modu, assecuradas formas giustas de informatzioni, partecipazioni e agiudu a is utentis.

Articulu sessantases Manigiu in economia

1. S'organizazioni e s'esercitziu de is sreibitzius in economia funt de règula, disciplinaus de regulamentus fatus a posta.

Articulu sessantaseti Aziendas specialis

1. Su Contzillu Comunali, in s'arrespetu de is normas de ley e de su statutu, deliberat is atus constitutivus de aziendas specialis po fai triballai is sreibitzius produtivus e de sviluppu economicu e civili e ndi aprovat su statutu;
2. Su statutu de is aziendas specialis e is regolamentus insoru, narant comentu funti fatas e comentu depint triballai, is regolamentus funti aprovaus de su Contzillu de Aministratzioni de is aziendas e totu;
3. Su Contzillu de aministratzioni e su Presidenti funti nominaus de su Contzillu Comunali foras de issu e totu, in mesu de cussus chi tenint is titulus po essi eligiu Contzilleri Comunali e tenint specialis cumpetentzias aministrativas.

Articulu sessantotù Istituzionis

1. Su Contzillu comunali po fai triballai beni is sreibitzius socialis, chi tenint necessidadi de autonomia de gestioni, fait Istituzionis cun atu fatu a posta chi cuntentidit su regulamentu chi disciplinadat su triballu de s'istituzioni e po mesu de un un pianu tennicu-finanziariu fatu aposta innui arresultinti: is custos de is sreibitzius, i formas de finanziamentu e tòtus i benis chi si tenint fintzas su dinai contanti;
2. Su regulamentu segundu su chi est nau in su primu comma determinat, in prus, sa dotazzioni orgànica de su personali e s'assentamentu organizzativu de s'istituzioni, is maneras de exercitziu de s'autonomia gestionali, s'ordinamentu finanziariu e contabili, is formas de controllu e de aberigamentu de is resultaus gestionalis;
3. Su regulamentu podit prevedi sa tzerriada de personali chi benit pigau cun raportu de diritu privau, e puru de collaboratzionis meda professionalis;

4. Su Contzillu comunali decididit is indirizus e is finalidadis de is istituzionis, in prusu is criterius generalis po decidi is tarifas po is benis o is srebitzius, aprovat is bilancius de dogna annu e de prus annus, is programmas e su Contu consuntivu de is aziendis specialis e istat atentu asuba de su chi faint;
5. Is òrganus de s'istituzioni funt su Cuntzillu de amministratzioni, su Presidenti e su Diretori.

Articulu sessantanoi
Sociedadis a su prus de capitali pùblicu de su logu

1. In is Statutus de is sociedadis a su prus de capitali pùblicu de su logu depint essi prevìdias is formas de acòdriu e collegamentu intra de is sociedadis e totu e de su Comuni.

Articulu setanta
Sociedadis po atzionis o a responsabilitadi limitada.

1. Su Contzillu comunali podit giai su permissu a s'enti de fai parti a sociedadis po atzionis o a responsabilitadi limitada po su manigiu de is srebitzius publicus, in su casu podit fintzas providi a ndi fai a nou;
2. S'atu constitutivu, su statutu o sa còmpara de partis o atzionis depint essi aprovaus de su Contzillu comunali e depit essi in dogna casu assegurat sa rappresentatividadi de is sogetus publicus in is organus de amministratzioni;
3. Su Comuni sceberat i rappresentantis suos in mesu de chi tenit cumpetèntzia tennica e asuba de su triballu e in su manigiu fait de tòtu po cuntentai is abbisongius de tòtus;
4. Su Sindigu o chi po issu pigat parti a s'assemblea de is socius po rappresentai s'enti;
5. Su Contzillu Comunali portat a castiu dogna annu su manigiu de is sociedadis po atzionis o a responsabilitadi limitada e a cuntrollai chi sa colletividadi est amparada beni de su triballu de sa sociedadi e totu.

TITULU CUINTU
ORGANIZATZIONE DE SA STRUTURA OPERATIVA

Cabudu primu
Principius e organizatzioni de is officius de su personali

Articulu setantunu
Criterius generalis

1. Su Comuni fait triballai is officius e su personali tenendi presenti s'autonomia sua, sa funtzionalidadi e s'economicidadi de sa gestioni po assegurai chi s'amministratzioni siat cosa beni fata;
2. Su triballu de s'amministratzioni comunali s'ghidi su critèriu de sa divisioni de totu su chi riguardada s'indiriztu e su cuntrollu politicu e amministrativu chi benit fatu de is organus politicus de s'Enti, de su manigiu chi invecias est triballu de su Segretariu Comunali, de su Diretori Generali chi est nominau, de is Responsabilis de is srebitzius comenti narat custu Statutu e is

Regolamentus. Su comuni fait su chi depit po coberri cun s'assegurazioni sa responsabilidadi civili de is organus de manigiu giai nominaus fintzas po s'amparu legali;

1. Su manigiu acapiat su triballu finantziariu, tennicu e amministrativu strumentali a cussus chi funti is obietivus innui si depit lompi;
2. Is organus de manigiu giai nominaus in su segundu comma, comentu narat sa ley, su statutu e su regolamentu, faint su triballu insoru impari a s'aparatu comunali, cun poderi de pigai decisionis e de gerarchia segundu is indirizus politicu-amministrativus chi ant tentu, e fintzas segundu is obietivus, is progetus e is programmas chi depint fai;
3. Is organus politicus, agiudaus de cussus de manigiu, giai nominaus in su segundu comma, binti impari chi is atus de indirizus point essi fatus.

Articulu setantaduus Principius de sa strutura e de s'organizazioni

1. S'Amministratzioni de su Comuni si ponit obietivus e depit essi cunformi a is principius chi sighint:
 - a) organizazioni de su traballu non prus po atus a solus, ma po progetus-obietivu e po programmas;
 - b) analisi e individuatzioni de is produtividadis e de is càrrigus funtzionalis de triballu e de su gradu de funtzionamentu de sa faina fata de dògnia elementu de s'aparatu;
 - c) individuatzioni de responsabilidadi atacada a s'àmbitu de s'autonomia me is decisionis de is sugetus;
 - d) superamentu de sa separazioni neta de is cumpetènzias in sa divisioni de su triballu e flessibilidadi a massimu de is struturas e de su personali.

Articulu setantatres Ordinamentu de is officius e de is srebìtzus

1. Su Comuni disciplinadat, cun is regolamentus apositus, in s'arrespetu de is principius de sa ley e cun cussu chi narat custu Statutu, su triballu de is officius e de is srebìtzus.

Articulu setantacuatu Sa strutura

1. S'organizazioni de sa strutura, mirat a sighi finis istituzionalis de s'enti segundu is normas de su regulamentu, est articulada in srebìtzus e officius fintzas chi appartenint a areas diversas, collegaus in manera funtzionali po cunsighi is obietivus assinniaus.

Articulu setantacincu Diritus e doveris de is dipendentis de su comuni.

1. I dipendentis de su Comuni, incuadraus in arrolus organicus e ordinaus in categorias segundu sa disciplina generali de sus tadu giuridicu e de su tratamentu de su personali stabiliu de sa ley e de is acodrius colletivus nazzionalis, faint su triballu insoru po cuntentai sa bidda;
2. Dognia dipendenti de su Comuni depit fai su doveri suu in manera giusta e luegu e in s'arrespetu de sa cumpetentzia sua depit lompi a is obietivus chi ddi funti stetius afidaus;
3. Su Comuni promovidi s'aggiornamentu e su miglioramentu de is dipendentis de su comuni cun sa formatzioni e sa cualificazioni de su triballu; assegurat s'amparu de sa saludi e de

s'integridadi de su corpus e de sa menti de su dipendenti e ndi assegurat sa libertadi e is diritus sindacalis;

4. Sa disciplina de i dependentis de su comuni est riservada a is atus normativus de s'Enti chi sighint i leys e su statutu.

Cabudu segundu ***Su Segretariu comunali***

Articulu setantases **Su segretariu comunali**

1. Su Segretariu comunali, in s'arrespetu de sa ley chi ndi regolat su stadu giuridicu, su rolu e su chi depit fai est s'organu chi assegurat sa dirigidura tennicu-amministrativa de is oficius e de is srebitzius;
2. Po fai totu su chi est steti decidu de s'Enti, su segretariu fait su triballu suu cun podestadi de iniziativa e autonomia de scebera de is ainas chi ddi srebint;
3. Is funtzionis e is competenzias de su Segretariu Comunali funti stabilias in su regolamentu de organizazioni in s'arrespetu de is normas de ley e de custu Statutu.

Articulu setantotu **Su Vicesegretariu comunali**

1. Su regolamentu de organizazioni podit prevedi un Vicesegretariu Comunali, sceberau in mesu a unu de is funtzionarius prus artus de s'enti chi tenit tòtus is titulus chi narat sa ley;
2. Su Vicesegretariu Comunali triballat impari cun su segretariu e ddu arremprasat candu custu non c'est o non podit.

Cabudu tertzu ***Funtzionis de manigiu.***

Articulu setatntotu **Indiritzu**

1. Is funtzionis de manigiu funti fatas de is responsabilis de is oficius e de is srebitzius, sceberaus de su Sindigu cun atu suu de nomina, segundu sa strutura organizativa definida de su regolamentu e de custu Statutu. Custu regolamentu prevididit comenti giai is postus fintzas cun contratus a tempus stabiliu, tenendi sempiri presenti is tutulus chi srebint po intrai de foras de s'enti, po sa categoria e su profilu de coberri;
2. Is funtzionis de manigiu funti fatas, aintru de is incarrigus giaus e de su triballu de cordinamentu e de sovrintendentzia de su segretariu comunali, o de su Diretori generali chi est nominau, po arribai a is obietivus e a is programas de sa Giunta e de su Sindigu;
3. Su Segretariu Comunali fait in manera diretta su manigiu chi ddi cumpetidi segundu su chi narat sa ley, custu statutu e su regolamentu de organizazioni;
4. Is chi funti titularis de is funtzionis nominaas in is commas precedentis, funti responsabilis in via esclusiva de s'atividadi amministrativa, de su manigiu e de is resultaas;
5. Po is obietivus determinaas e cun is conventzionis a termini, su regolamentu de organizazioni podit prevedi chi su Sindigu gedat collaboratzionis a foras chi siant de grandi profesionalidadi;

6. Su regulamentu de organizazzioni podit prevìdi de fai ofìcius chi funti a is dipendentzias de su Sindigu o de is assessoris po ddu s'agiudai a fait su triballu insoru, po mesu de is dipendentis de aintru de s'enti.

TITULU SESTU ORDINAMENTU FINANTZIARIU E CONTABILI

Cabudu primu Demàniu e benis

Articulu setantanoi Demaniu e proprietadis

1. Su Comunu tenit su demàniu e patrimoniu pròpriu, in cunformidadi a sa Ley;
1. Is terrenus sogetus a s'impreu civicu funti disciplinaus de is dispositzionis de is leys specialis, chi règulant sa matéria e de su regulamentu;
2. De tòtus is benis comunalis dogna annu si faint inventarius a minudu;
3. Un regulamentu apositu at disciplinai is bèndidas de su patrimoniu. Custu regulamentu at disciplinai fintzas comentis si depint rilevai is benis de su comuni, su manigiu e su controllu de rtantu in tantu de is inventarius.

Cabudu segundu *Impiantu contabili*

Articulu otanta Ordinamentu de sa contabilidadi de su comuni

1. S'ordinamentu de sa contabilidadi comunali dependit de sa ley e de su regulamentu comunali de contabilidadi;
2. Su manigiu de is finantzias de su Comuni si fait segundu su bilanciu annuali chi est prevìdiu in terminis de cumpetentzia, deliberau de su Contzillu Comunali, sighendi is principius de universalidadi, unidadi, annualidadi, vericidadi, publicidadi, integridadi e de s'aparixadura economica e finantziaria;
3. Su Bilanciu de Previsioni, su Contu Consuntivu e is atrus documentus contabilis depint essi scritus de modu chi si point ligi is programas, is progetus in manera chi si potzat fai un controllu finantziariu e contabili, fintzas cussu po su manigiu e cussu asuba de su chi si otenit cun su chi fait su Comuni;
4. In su triballu de revisioni point essi fatas propositas de su Contzillu Comunali in materia de manigiu economicu e finantziariu de s'Enti. Su Contzillu podit domandai informatzionis e propositas a is ofìcius interessaus po sciri comentis andant is cosas finantziarias e economicas e comentis funti manigiaus is atus importantis, massimamenti su manigiu de is s'rebitzius.

Articulu otantunu Rendicontu de su manigiu

1. Totu is cosas chi faint parti de su manigiu funti bogadas de sa contabilidadi finantziaria e economica e ammostadas in su rendicontu innui ddui est su contu de Bilanciu, su contu economicu e su contu de su patrimoni cun is modalidadis e is terminis stabilis de sa ley;
2. Sa giunta comunali aciungidi a su rendicontu una relata innui narat su chi pentzat asuba de su chi est steti fatu si est srebiu a otenni su chi si fiat pentzau de fai in is programmas e a su chi est steti spendiu, aciungidi puru sa relata de su revisori de is contus.

Articulu otantaduus Revisori de is contus

1. Su Contzillu Comunali eligidi, sceberendi asuba de unu candidau sceti, su revisori de is contus segundu su chi narat sa ley;
2. Su revisori tenit su diritu de intrada a is atus e a is paperis de s'Enti, abarrat in carriga tres annus, si podit torrai a eligi sceti una orta e est revocabili candu non fait su chi depit e puru candu ddui funti cosas gravis chi no ddi permitint de fai su triballu suu;
3. Su revisori triballat impari cun su Contzillu comunali po cussu chi depit fai issu de controllu e indiritzu, cadiat chi est fatu totu in regola po cantu riguardada sa contabilidadi e sa finanzia in su manigiu de s'Enti e atestat chi torrant su rendicontu cun su chi arresultada de su manigiu, fendi una relata chi acumpangiat sa proposta de delibera de su Contzillu de su rendicontu de su bilanciu.

Articulu otantatres Aberigadura de su manigiu

1. S'aberigadura tenit su scopu de biri a ita puntu funti is cosas programmadas, chi su manigiu de is cosas publicas est fatu beni, s'impartzialidadi e su camminu giustu de sa publica amministratzioni e sa trasparenza de is cosas chi fait s'amministratzioni;
2. Tocat chi in su regulamentu de contabilidadi ddui siant spricadas tötus i maneras po fai triballai is ainas de cuntrollu internu, in prusu is formas de conventzionamentu cun atrus comunis e de incarrigus esternus.

Cabudu tertzu Coberai is intradas

Articulu otantacuattru Srebitziu de tesoreria

1. Su Comunu tenit su servìtziu de tesoreria chi depit:
 - a) coberai totu is intradas comunalis versadas de is chi tenint dèpidus e de su concessionàriu de su srebitziu chi coberat is pagamentas;
 - b) pagai is spesas ordinadas cun mandatus fatus a posta me is limitis de is stantziamentus de su bilanciu e de is disponibilidadis de sa cassa;
 - c) sa pagamenta de is ispesas cumandadas gratziàs a mandaus de pagamentas aintru de is possibilidadis de su bilanciu e de su chi podit fai su Comuni;
 - d) sa pagamenta, manca non ddui siant i mandaus, de is arratas de ammortamentu de is mutuus, de is contributus previdenzialis e de is atras sommas decidias de sa ley.

2. Is acapius de su Comuni cun su tesoreri funti arregolaus de sa ley, de su regolamentu de contabilidadi e fintzas de una conventzioni fata a posta.

Cabudu quartu
Is agentis contabilis

Articulu otantacincu
Contus de is agentis contabilis

1. Su regolamentu de contabilidadi disciplinat, comenti narat sa ley, is modalidadis po is contus de su tesoreri, de s'economu e de is atrus agentis contabilis.

Cabudu cuintu
Atividadesi cuntratuali

Articulu otantases
Autonomia cuntratuali

1. Su Comuni, aintru de su chi narat sa ley e is regolamentus suos, in s'arrespetu de is principius chi regolant s'atividadesi amministrativa, podit fai totu su chi s'rebit po fait su chi at prevediu, impreat po custu ainas publicas e privadas candu fait.

TITULU SETIMU
DISPOSITZIONIS FINALIS

Cabudu primu
Normas transitorias e finalis

Articulu otantaseti
Statutu

1. In su Statutu ddui funti tötus i normas prus importantis de s'ordinamentu comunali. Tötus is atus de su Comuni si depint regolai asuba de su Statutu;
2. Est ammittia s'initiativa de parti de su Contzillu comunali po cambiai su statutu, fintzas de parti de sa Giunta, de calisiasat contzilleri e citadinu, segundu su chi narat custu statutu e totu;
3. S'aprovatzioni de calisiasat cambiamentu a su testu de su statutu, chi depit essi adotau de su Contzillu comunali segundu su chi narat su testu Unicu de is Entis Localis, depit essi sighiu de sa riprodutzioni de totu su Statutu aggiornau, in manera de permiti a calisiasat citadinu de ddu connosci in manera precisa;
4. Su Statutu e is modificatzionis suas, in su tempus de 15 dis a pustis de sa data de esecutividadesi, funt postus asuta de formas de publicidadesi chi permitint de ddus conosci in manera precisa.

Articulu otantou
Regolamentus vigentis

1. Is normas chi ddui funti in is regolamentus depint essi adeguadas a is normas de su Statutu;
2. Fintzas a is adeguamentus chi si funti giai nominaus, abarrant in peis sceti is normas compatibilis cun custu Statutu.

Articulu otantanoi
Intrada in vigori de is regolamentus

1. Is regolamentus intrant in vigori 15 dis a pustis de sa publicatzioni insoru, custa si fait candu est esecutiva sa deliberatzioni;
2. Is regolamentus depint essi a su connotu de tòtus, depint essi acessibilis a dognunu chi ddu su cherit castiai.

Articulu noranta
Adeguamentu de is fontis normativas comunalis a leys chi funt arribadas a pustis

1. Is adeguamentus de su Statutu e de is regolamentus a is leys noas si depint fai in s'arrispetu de is principius de s'ordinamentu comunali cuntènnius in sa Costitutzioni, in su Testu Unicu de is Leys asuba de s'ordinamentu de is Entis Localis e in atras leys e in su Statutu e totu is normas chi sighint e chi funti importantis po su Statutu intranta in vigori luegus.

Articulu norantunu
Intrada in vigori

1. Custu Statutu est publicau in su Bolletinu Ufficiali de sa Regioni, postu in s'Albu Pretoriu po trinta dis de sighiu e mandau a su Ministeru de s'Internu po essi postu in s'elencu ufficiali de is Statutus;
2. Custu Statutu intrat in vigori trinta dis a pustis de essi steti postu in s'albu pretoriu de s'enti.